

欽  
定  
全  
唐  
文

欽定全唐文卷八百七十四目錄

陳致雍 二

博士高遠奏改顏子祝文議

再改正顏子充國公祝文議

定皇太弟服魯國太妃喪儀議

改正太廟遷祔神主議

請公除預祭議

廟像無婦人配座議

牒太廟置令釐革請御署齋官不合拜禮議

太廟設甄劒議

邊鎮節度使諡議

文臣諡議二首

國子監官諡議

勲臣諡議

高士諡議

東宮官諡議

吏部官諡議

諫官諡議

鎮海軍遙授衢州刺史李萬安諡議

和州刺史馬洪諡議

汀州團練使余廷英太尉諡議

刑部尚書嚴紹諡議

工部尚書刁紹諡議

龍衛軍副統軍史公鉅諡議

知饒州刺史林廷浩諡議

天德軍使程成諡議

劍州刺史高隋諡議

司農卿元稹諡議

小殿直諸指揮廂虞候劉匡範諡議

泰州刺史陶敬宣諡議

太尉李金全諡議

故歙州刺史太尉楊海諡議

司空游簡言相公諡議

濠州團練觀察使郭全義諡議

前蘄州刺史李寶諡議

左街使侯仁遇諡議

寧國軍節度使陳謙諡議

欽定全唐文卷八百七十四

陳致雍二

博士高遠奏改顏子祝文議

右竊以祝嘏之說已著開元禮中升降兩義不同大祝云  
敢昭告小祝云昭告諒其損益盡在往典今高博士請改  
前經未敢爲允旣尊其爲師待以不臣豈可抑以祀典援  
其公爵者或商容呂迎逸免也武王式閭維師尚父尚當  
一時君臣亦不北面爲禮況顏子德冠師門道光亞聖千  
古景行一人而已開元禮太宗纂之高宗述之元宗定之

垂爲永則豈合改作謹議

再改正顏子充國公祝文議

右臣先據太常博士高遠奏改文宣王配座顏子充國公祝文昭告字援小祀例爲致祭高遠意者爲與武王祝稱不等欲不敢御署蓋迺至尊降屈行拜敬之禮殊不知中祀云昭告亦進御署署訖皇帝不拜今旣升文宣王爲大祀充國公卽便是中祀而況顏子德冠孔門徇齊聖智佐食則絕席居前侑醕乃服袞在上旣禮容以相稱何貶拂而太懸武成王祝文開元天寶中亦云昭告進署不拜至



正元年兵部員外郎李紆奏節文云太公述作止於六韜  
勲業形於一代豈可擬文宣王之盛哉遂改損昭告字云  
致祭不進御署今者國朝以其拯民靖亂崇德報功再奉  
嚴禋重構廟宇光靈顯被聖澤優裒聖典旣修舊章宜正  
臣卻請升武成王祝文仍舊歸昭告字國公則不合更貶  
祝仍准禮大祝進御署拜中祝御署不拜夫禮者別尊卑  
名輕重奉常泂酌折衷後亦何必矯飾閒辭蕪穢簡牘穿  
鑿往事紊亂彝章視茲二途指歸一揆謹具奏聞

定皇太弟服魯國太妃喪儀議

皇太弟繼統儲宮不得申其喪紀只服緦麻三月服三日  
公除按喪服傳曰何以緦也與尊者爲體不敢私其親今  
據禮經則是子承父之禮主曾宗廟承名器之重不敢申  
私親之服若服則是廢尊者之祭謂於死於宮中者三月  
不舉祭是也又云君之所不服子亦不敢服開元禮引喪  
服比公子爲其母練冠麻衣纏緣旣葬而除練冠則白練  
布爲素冠麻衣纏緣今之白練布爲衣裳纏緣其裳也近  
代庶俗多用白布襴衫非先王喪紀之法服准令文三日  
成服朝晡五哭止具成居處飲食哭位則從其心喪至葬

期反服既葬除服禮也

改正太廟遷祔神主議

臣聞王者之孝莫大乎尊祖有國之儀必先於崇祀採質文之損益正宗廟之祧遷載在前經垂爲重事國家中興土運再造皇猷雖殷薦之禮孔昭而正名之典未舉王良臣因崇清廟遂上封章臣備位明庭攝官禮寺祇承末議思盡寡聞謹具條奏如後

太祖之廟及不遷之主

禮云天子始受命諸侯始受封爲太祖之廟國初以景皇

帝始封唐公慶延奕葉高祖雖撥亂以定天下其實因唐  
以爲有國之號改尊景皇帝爲太祖然前代諸儒亦議者  
非一愚臣竊以謂高祖神堯皇帝頃在隋季民實墜塗而  
濡足救人乘時啟運天命允集厯數在躬豐功厚德比崇  
三代洎奸凶僭逆皇祚中微九有之民猶思唐德本枝百  
世貽厥孫謀故烈祖高皇帝再造丕基光宅大寶昇元初  
以高祖有克定之業實受命之君尊居太祖之位是爲不  
易之典酌中考古允得其宜太宗文武皇帝定策濟時戡  
難立極惠周四海道冠百王烈祖考高皇帝仗義中興應

期繼統功逾嗣夏化洽重熙以二聖有大造於人故兩室居不遷之地自餘親親之廟存者四焉

四親及義祖神主合出太廟

夫承祧繼統則降其私親尊祖敬宗則存其大義歷代已降何莫由斯是以先晉元之中興而南頓令與瑯琊恭王不祔太廟於春秋之義國君卽位未逾年而薨者尚不祔太廟又神龍中義宗孝敬皇帝以儲后追尊入祔太廟尋從輿論亦別創嚴祠而況四親位匪君臨地非正統高皇帝旣承太宗之後所謂以義斷恩敘之昭穆未合典故伏

見保大初給事中朱翬著作郎徐鉉奏引秦漢故事請定  
宗孝靜皇帝成宗孝平王惠宗孝安王慶宗孝德皇帝宜  
準例於潛龍故地別創新祠以四時而祭既協尊祖之義  
別爲祭禰之宗其太廟昭穆請自昭宗已上未祧遷神主  
祔並及請遷義祖神主於祠堂就飾廟庭別建嘉號如德  
明興聖二廟之比者準其年十二月勅文我國家務存孝  
敬理在不祧羣官但據典經故禮當迭毀予不敢違先皇  
之命不敢忘義祖之恩是降勅書期同闕二字勞於寤寐誠  
亦未安何者先皇御札尚新言猶在耳儒者已微典實議

論紛紜苟歲月旣徂德音漸遠畢朕之世雖云厥心不回  
後代之人且憂其意可奪如是則隳先皇之孝敬豈無時  
焉祧義祖之神靈信有日矣誰當執咎予用悔然欲其求  
萬世之永安未若割一朝之罔極奉於不祧之地冀絕親  
盡之言嚴恭無虧告享於舊上匪違於先旨下何傷於孝  
心咨爾宗親當體朕意宜委所司於祠堂別建後殿安置  
塑像其前殿奉遷祖主以居其寢庭制度祭享之禮一如  
舊儀永爲不祧之廟者所爲因時適變以公滅私載考聖  
謀實符命議雖義祖之廟已正於典禮而四親之主合同

金史卷一百一十五 禮志一  
於漢晉是爲師古人何間言其四親廟臣請依朱輩等原  
奏施行或以潛龍故地稍遠恐虧嚴敬只依京都建祀於  
禮無愆其義祖祠建請准元勅處分

懿宗已下合祔太廟

伏以懿宗僖宗昭宗三室地未當遷禮宜祔廟請依昭穆  
以奉烝嘗五時享焉

高祖已下祧廟

伏以高宗至宣宗十四室雖親盡當毀而禘祫之祭合敘  
昭穆今請各造神主居於夾室



右臣致雍文慚學禮業昧通經忝在奉常恭承議問須陳  
管見敢副宸衷然而宗廟居尊祀事爲大必資時彥共啟  
詢謀伏請更於通班各徵議狀然後酌臣可否繫在睿明  
謹具奏聞

請公除預祭議

右臣伏見太廟行禮百官有總麻服已上並不預祭謹按  
禮經諸侯絕旁親之服不敢廢大宗之祭謂官未葬者欲  
人吉凶不相黷也魏晉已降變行權制總麻已上假內謂  
之喪服假滿卽吉謂之公除今旣葬公除廢葬非也彼公

除者使人各得其祭苟私祭不廢則公除無嫌請准開元七年正月七日吏部奏依江左當時知禮者虞譚殷仲堪等議相承等行之久矣凡有百執事齋郎室長禮生已來並擬請申詳前令行公除助祭之禮

廟像無婦人配座議

准祠部牒據禮賓使何延錫狀爲元應王副嬖公各授官封冊所服冠裳及女人有塑像同座共享兼畫僚屬等乞賜改正移易庶合典禮者右檢封祠之制古來有有功於民者則祀之無績容飾醜之狀自漢魏以降所在州郡有神

祠塑像衣冠人物有夫婦共座配食之者未知其所由來也於禮無文雖云配祔宗廟鬼神孝子感親之所今元應王遺跡置祠副嶺公或山川之神各有受封爵有受封爵有其廟宇之制殿堂之上左右列侍衛臣僕像人居然如其諸侯外朝正寢之式春秋祀享准令文皆州縣供其牢醴之物長官拜祭祀以夫婦配食之義不同今未委准禮移婦人共座居別座其王各依准衣服令等降飾以袞冕九章之服婦人無爵衣褕狄九章於禮爲中仍請差工人就禮院畫衣服章數制度施行者

牒太廟置令釐革請御署齋官不合拜禮議

右檢今月十四日冬享太廟伏見攝太尉及亞獻官御署祝版到廟先於殿前拜謂之參神如家人之禮竊以夙興行事裸鬯之後神靈降止然後方行拜敬之禮今未見其所祭而於致齋之內造次撩覲頗甚褻慢事須舉明自今已後便釐革者

太廟設甄劒議

據太廟置令王崧申凡遇時享齋郎薦獻皆是每人兩番或三番不免紛紜執事或有差互獻官寧免淹延舊例簠

夫服勤官次景行有彰終身則敬忌不忘請諫而褒崇匪  
恠某人端明立身公正楷俗踐揚名級暉映士林適自入  
奉承華毗荷儲季克宣令範廉正有稱謹按諡法云廉直  
經正曰敬

吏部官諡議

夫啟殞告諡德行有褒追美旌功於焉斯著某人度量宏  
達秉直在躬首自贊職銓衡不遺器任精裁人物疎附允  
中按諡法云附不黨疎不遺是曰平也

諫官諡議

夫生不可奪節死不可奪名身歿名垂旌大厥美某人忠  
鯁維亮風概愈高端委諫垣民宗盛貫極言累進規正宏  
綱是謂直臣合旌遺烈按諡法云中正無邪曰質

鎮海軍遙授衢州刺史李萬安諡議

伏以李萬安器度不羈雄豪獨處義勇兼著寬猛相須嘗  
毗荷以親賢率衛兵而整肅累刺臨於列郡治封部以乂  
寧在昔邊淮之兵連營棄甲惟黃之郡嬰城不拔卻敵之  
力萬安有功謹按諡法決勝壯敵曰毅

和州刺史馬洪諡議

伏以號以表功諡以表德慎重厥美君子有終故檢校太保威衛將軍前和州刺史馬洪勇於戰鬪鬱有壯聲動必擒凶舉無遺策被堅執銳率居行陣之先畧地攻城每在衆人之上一麾臨郡嘉績有聞今也身歿名垂請諡匪怪引義爲用厥諡彰矣按諡法率義供用曰勇其馬洪請諡曰勇謹議

再定

伏以見諡知行終身有稱用旌將帥之臣可著簡編之美馬洪壯於戰鬪知勇亟聞考狀昭詳克揚前烈平霍邱之

賊縛周令殷於陣前解彭城之圍擒何仁達於馬上數其軍實夥矣前功今也云亡噫然可惜致果殺敵厥諡彰矣其馬洪請諡曰毅謹議

汀州團練使余廷英太尉諡議

伏以廷英承家軒冕肇迹東南少年以應聘諸侯厥名貴仕往歲以開區啟宇宰府登庸伯叔世替夷奸臣擅命廷英智能料主謂故土不可卽宮首率諸侯尊事大國保全多體思寧後昆觀闕一字始終允而彌顯按諡法深慮通遠曰思謹議



再定

伏以廷英粵自東南少登貴仕忠其所奉人曰匪躬垂三十年其勤亦至洎王師恢復建壘克平被天朝之懋恩列卿等之華級只爲神臬承乏侯服分憂爲政理躬有足多者溘然長逝用惻宸衷考行易名敢私典故按諡法名實不爽曰質請以爲諡謹議

刑部尚書嚴紹諡議

按考功送到行狀稽其往迹敬慎有終紹服爵承家時推華胄考祥視履人垂匪躬旣名行以弗愆諒定質而可取

按諡法純行不爽曰定名實不爽曰質今請一字諡曰某  
謹議

改諡

據考功錄到門人華歸仁記其行事蓋惟誅貴之文有司  
以之弗取復詢輿論無損士風紹服爵登朝檢身立事名  
行旣無愆爽始終須示褒崇按諡法云名實不爽曰質謹  
議

工部尚書刁紹諡議

據行狀紹前後從公歲華更事匪躬奉上盡瘁勤王爰自

牧守海陵化數邑里民情稱理奏課居多議名之端歸美於行紹向來安身不競修己自保敬慎有聞始終若一按諡法小心恭慎曰僖謹議

龍衛軍副統軍史公銖諡議

公銖祖世朔方捍藩顯功爲唐名將公銖便弓馬習戎事有名父之風刺郡部近民情知良吏之節性和不損撫士寬容考終之名用以爲諡按諡法寬容和平曰安其史公銖請諡曰安

知饒州刺史林廷浩諡議

伏以廷浩勇而有謀臨事卻敵往歲北師衆至來攻泰州  
是時孤城且危外援不救廷浩能厲士卒分地捍禦鑿展  
深塹斷絕飛橋俟彼布陣援旗引鬪纔渡中河半多陷溺  
不有奇畧安能保全諡法臨事有斷曰勇

天德軍使程成諡議

程成起自行間累以戰功爲時名將頃在合肥頻經大敵  
旣斬獲數多賞在上等因且奮身不顧負楯先登陷彼堅  
陣而被執不撓諡法恃義不撓曰勇元宗皇帝收獎前勲  
制辭云抗誠不撓奉主言堅命秩旣崇忠義可取按諡法

云恃義不撓曰勇

劍州刺史高脩諡議

往歲閩人怙亂賊臣不庭連結外兵竊據東境隋時爲裨將分守上游號令精明訓御嚴整善治攻具妙用戈船下

延平

闕一字

夷之軍破橫海艘艚之衆越寇畏襲邊郡謐寧

剋敵服叛累功多者舉一爲諡謹按諡法服叛定功曰威謹議

司農卿元凜諡議

伏以凜文爲已華用能進業行爲士本居則撝謙因厯聘

諸侯從事楚部在官凡二十任莅職僅五十秋然而物議不誼祿位無曠矧遇季主荒急遭時艱難絕居不疑履危無咎保全名節歸休聖朝據行狀云去夫二國不遺惡聲事夫六君不流靜讚按諡法小心恭慎曰僖去二國事六君無惡聲無流讚不謂恭慎乎其諡元凜曰僖謹議

小殿直諸指揮廂虞候劉匡範諡議

誕生將門爰有命聞寬柔得衆勤恪在公幼襲世封克荷先業以忠正奉國以孝悌承家頃奉朝恩守牧滌上民無冤滯吏絕侵漁期年有成風俗大治又據行狀云爲皇城

使日值北師來侵京邑騷動匡範忘食輟寢晝警宵巡仍散私財以募兵士屢陳章疏乞預征行念茲勤勞夙夜敬事按諡法勤勞無私曰順謹議

泰州刺史陶敬宣諡議

伏以君子沒世而名有可稱諡以德彰克旌厥美陶敬宣貴襲公爵以文立身華貫繼登允光前烈洎師都亞尹廉正有方東吳牧民勤恤不倦寬裕順理惠和以施諡法慈仁和民曰順其陶敬宣請諡曰順謹議

太尉李金全諡議

欽定全唐文

卷八百七十四

陳致雍

五

夫功成事卒身歿名垂平昔茂勲足以定寵故其資性忠  
果威畧有成履行端莊聲實無替往以大憝移國僞梁僭  
圖金全有致討之功復安天步紹宗繼統入扈乘輿式掌  
兵機克總侯府而又累仗全越出捍邊危種落安寧疆場  
肅靜酬勲錫壤皆踐大藩金全知皇運中興能以義諭臣  
僚聿來慈服諡法慈和徧服謂之順李金全請諡曰順謹  
議

故歙州刺史太尉楊海諡議

右詳門吏錄到行狀楊海父祖仕郡縣爲吏海始明經調



選有開厥嗣傑作將臣性懷不羈雄豪獨處昔歲中州紛  
擾羣盜縱橫自言力勝於人分部得衆歸命我朝爰服休  
恩擢在上將期門清蹕勾陳衛兵統禦得權嚴整有序用  
海爲新安守到任知物情之所未便補累政之所未修治  
隄防築壁壘蠲水害利民居勤績著聞功用可取謹按諡  
法施勤無私曰順請諡曰順

司空游簡言相公諡議

按公正明在躬亮直秉性出光帝載位冠朝端昔者職處  
掖垣兼持銓綜士無濁者官盡得人踐文章之臺治紀綱

之要奸吏展畏貪夫廉隅言必至公門絕私謁日者越人  
皆誕寇我近畿餘穢盡誅首惡未諭方生釁隙遽詔行人  
受命而行臨事有斷洎登宰輔允副具瞻股肱其良邦家  
殄瘁議名請諡敢忘至公謹按諡法廉方公正曰忠臨事  
有斷曰肅

濠州團練觀察使郭全義諡議

濠州郡團練觀察等使郭全義薨夫諡以行政行因諡立  
克揚茂烈追美成功全義端委和門明慎師律入司侯府  
出踐藩垣民政武功雖書甲令易名考行未請省曹今以

啟殯有期書方仍待且據郭全義策名已來夙居戎表勇  
能致敵用以爲褒按諡法云好力致勇曰莊謹議

前蘄州刺史李寶諡議

寶委質聖朝奮身戎表位兼隆於中尉才復任於列藩勤  
已居方垂仁訓俗考行誕敷其往烈飾終克保於令名行  
狀云以援桴鞠旅爲已任以燧燔烽舉爲時行然而戎候  
自虛懿誠未誠諡法曰武而不遂曰莊謹議

奉宣旨改諡

又據狀寶天祐中附翼戎臣仗劍東渡委質聖朝是爲知

危亡之理慎思慮之謀以義而來克安永嗣諡法云思慮不爽曰原謹議

左街使侯仁遇諡議

侯仁遇立身端謹前後更厯職任誠節無替往歲攻圍福州之日能厲士決戰奪其城壘殺獲甚多雖功用弗成而壯勇可激按諡法武而不遂曰莊

寧國軍節度使陳謙諡議

伏以陳謙少年有鄉曲之譽倜儻義烈直氣不羣頃值東甌兵擾與其伯仲招結猛士擒賊立功拔爲上將習戈船

水戰之師統劍津下瀨之旅破錢塘軍威振越人界壤海  
圻兵不敢犯保邦庇民謙之功也近者執圭入覲再陟帥  
壇俾賴式遏之功永作藩垣之固天胡不憖奪我帥臣歸  
葬有期啟殯請諡用旌前烈敢忘至公按諡法好力致勇  
曰莊其陳謙伏請賜諡曰莊謹議

欽定全唐文卷八百七十五目錄

陳致雍 三

龍衛軍左廂諸指揮都軍頭故歐陽權諡議

光山王延政諡議

蔣彥威諡議

左宣威軍使張于諡議

駁奏議周進卿諡議

洪府神武軍左右親從兩指揮都虞候故孫漢遇

諡議

孫晟諡議

常州防禦使李守義諡議

鄂州副使前沂州刺史劉敬文諡議

德勝軍節度使孫漢威相公諡議

汀州刺史張延嗣諡議

故虔州節度使賈匡浩相公諡議

右千牛衛將軍白福進諡議

太尉劉崇佑諡議

軍使孫彥潛打毬馬墜死諡議

江西節度副使馬希蘊諡議

海州兵馬監押吳廷英諡議

右驍衛大將軍致仕故王令莊諡議

諫議張易諡議

右領軍衛將軍譚漢鐸諡議

諫議大夫江文蔚諡議

太弟少傅李匡明諡議

保義軍節度使鍾承勣諡議

司空嚴續諡議



右千牛衛將軍王再興諡議

右衛使司空李承祚諡議

龍衛軍使司空劉崇禧諡議

太尉王建諡議

左威衛大將軍瑯琊太尉侍中王府君墓誌銘

并序

序

唐故金華大師正和先生劉君碑銘

并序

欽定全唐文卷八百七十五

陳致雍 三

龍衛軍左廂諸指揮都軍頭故歐陽權諡議

右竊以前件人夙處和風時推驍將屢行征伐亟著勲勞  
爰自淮壤出師滁城卻敵縱鐵騎而從突拔予戟以先登  
破陣雲騰畏威風靡稽其行狀先皇制命云爾能前率騎  
兵身先矢石心堅効命勇有可觀豈不謂好力致勇乎謹  
按諡法好力致勇曰莊其歐陽權伏請賜諡曰莊

光山王延政諡議

光山王延政昔者無諸舊壤閩越分封惟嗣承慶基立爲  
極洎平末途弗諉景祚中零因懷順軌之風永感安宗之  
念加以敬恭事上慎重寡言作牧鄱陽民安其化舉是美  
者俱爲諡焉謹按諡法敬恭事上曰恭安民法故曰定請  
以恭定爲諡

蔣彥威諡議

銀青光祿大夫檢校司徒右千牛衛將軍兼御史大夫上  
柱國蔣彥威卒據狀以雲翼馬軍教授衛兵彥威趨捍過  
衆騎射絕倫訓練之方申明有律行狀昭載易名可稱謹

按諡法云治兵不遷曰簡謹議

左宣威軍使張于諡議

據行狀竊以于昔年參署戎府總掌簡要簡稽士卒規畫軍師幹局理事垂五十年勤亦至矣其爵命有等諒以名諡可加按諡法勤勞無私曰類

駁奏議周進卿諡議

竊以易名賜諡蓋用收獎死亡將帥之勲其或入則常直禁中扈蹕著勤出則斥候境土捍寇致力星霜累歲忠勇盡誠復有爵土可兼名實相稱者則與之周進卿附翼戎

臣策名環衛昔者惟以鞭弭隨事非因鞞鼓立功聖君柔  
遠之恩不循班例之選擢官亟奉再命厯職僅未四稔若  
使死之日班位可加不謂生之時功行無取而况卽日專  
征者百輩立功者無一人如此之流何足襄與自今已後  
在任未有勤誠立身全無異行者不合定諡

再奉勅旨定周進卿諡

伏以頃者中原作梗郡部多虞進卿隨戎車之徒惠然向  
化捨鞭弭之役從而策名荷祿驟列清朝衛躡末施微效  
以其違去喪亂歸慕聖朝愼思遠圖克保來裔按諡法思

慮不爽曰原謹議

洪府神武軍左右親從兩指揮都虞候故孫漢遇

諡議

藉父兄業爲將帥臣禦其翊衛之師宮陛盡肅總彼緹騎之任王府克寧方馳乃能適赴忠訓言其永逝用以易名漢遇立事以勤敬不替按諡法夙夜警事曰敬謹議

孫晟諡議

右伏以孫晟蘊經濟之才有慎重之操守之以正固潤之以文辭事先朝居密近之地登右輔稱弼諧之任周歷清

顯謨有聞望洎北寇侵軼邊郡驚騷於修德庇民之時奉  
執謹乘輅之命聞其情專報主動必應機班彪論中興在  
漢仲尼由大夫思魯深踐虎狼之國競全臣子之節雖死  
之日猶生之年爰考易名宣旌盡瘁孫晟精於文學達於  
政事專以知物多聞闕疑豈不謂博物多見乎爲一介之  
使奮不奪之節見危致命確乎不拔豈不謂之忠乎危身  
奉上曰忠其孫晟請諡爲忠

常州防禦使李守義諡議

竊以立諡之法先王所以懲惡勸善也雖士有百行考終

之道節一惠爲名守義奮身戎行位以勲立前後功行豈  
無可書者今復詳守義行狀任日有裨將秦銖稔惡聚徒  
懷害守義尋則俘擒之云有嚮報之語由神物幽附且守  
義薰旅訓民不能盡數君惠致來攜叛職爾之由未嘗引  
咎責躬而妄興妖語孽由自作神不可誣欲以此事歸美  
於功不曰疎乎按諡法好變動民曰躁改曰躡

鄂州副使前沂州刺史劉敬文諡議

伏以君子重終先王有禮旣允啟殯請諡弗違敬文允處  
和門夙馳戎畧武昌貳君勤勞於茲今也命歿有聞爰加



贈典令善類也不曰宜乎按諡法勤勞無私曰類劉敬文請諡曰類謹議

德勝軍節度使孫漢威相公諡議

竊以一昨淮壩用兵將統無畧或始陣懼敵或望風靡旗或挫而受降或窮而被執以至禍難相繼疆土仍侵而漢威能嚴整禦戎精明出令決勝有料動算無遺戎師屢攻城守不拔保全名節集大功勲捍禦多能易諡堪獎按諡法決壯勝強曰武折衝禦武曰毅諡曰武毅謹議

汀州刺史張延嗣諡議

伏以昔者東甌別部臨汀舊封兵革遭罹閭閻邑壘失俗方  
阜化民僅息肩延嗣鎮撫得宜物土咸若嗟乎永逝良用  
追恩按諡法綏和來民曰德改諡曰載

故虔州節度使賈匡浩相公諡議

伏以策勲諡行名實有倫善惡必書褒貶斯在故龍武統  
軍使檢校太傅同中書門下平章事河東郡開國侯食邑  
一千五百戶賈匡浩頃以程功積事服勤有年國朝疏爵  
之初人惟求舊洎剖符錫壤休顯亦多廬陵上饒聲化且  
著南康重鎮番禺連封五嶺之南惟王巨屏有溪洞獷民

昔嘗恃險竊聚妖兇匡浩控壓蕃要務去元惡致令滋蔓其徒攻剽廬舍而匡浩受方面重寄不曰徒然夫見義而動所舉必剋匡浩執心寡斷何所述哉按諡法述義不剋曰丁賈匡浩曰丁謹議

右千牛衛將軍白福進諡議

伏以一昨中州阻兵民庶遷蕩福進持其部伍靡所依歸此不右招彼何寧族來思之念順軌是圖按諡法深慮通遠曰思謹議

太尉劉崇佑諡議

崇佑襲先公之爵踐華胄之封而能稟受兵鈐精持戎律  
居中宿衛盡瘁勤王晉陵牧民同安治郡未幾滿秩咸著  
善聲行狀云爲政之日獄訟無撓民人又安按諡法勤恤  
仁隱曰德豈不謂獄訟無撓乎又曰寬衆優足曰德豈不  
謂民人又安乎其劉崇佑請諡曰德謹議

軍使孫彥潛打毬馬墜死諡議

孫彥潛少年以節概不羣雄豪獨處習兵家之法有名父  
之風訓士禦戎人皆稟令方立功業是賴將臣忽傷銜壓  
之虞遽痛垂堂之戒雖捐軀自効而獻命不忘謹按諡法

述義不克曰丁

再奉宣旨定孫彥潛諡

孫彥潛較藝武場馳驅君所雄勇効力誰曰不然昔魯莊公及宋人戰於乘邱縣賁父御卜國爲右馬驚敗績公欲罪其無勇二人遂赴敵而死及國人浴馬有流矢在白肉公曰非其罪也遂諫其赴敵之功以爲諡今彥潛亡命奔馭貽譏有司與其赴敵而死不同若責其垂堂之訓又太過也臣請改以武而不遂曰莊

江西節度副使馬希蘊諡議

伏以希蘊家甘啟土允胄襲封率事聖朝獲寧來嗣往令

藩任連彼

闕一字

華支轉之懷副軍是賴奄忽永逝於焉增

傷追遠之期易名可贈行狀云長自綺紈幼居祿位端莊  
慎密似不能言縱喜愠家人莫得而知之按諡云安心好  
靖曰夷

### 海州兵馬監押吳廷英諡議

伏以吳廷英早列內班頗聞幹事洎升監護亦克訓齊對  
敵而不避鋒鏑失律而莫諧功業遽從淪喪宜勸將來執  
固誠堅易名宜著按諡法義勇不遷曰果大戴禮曰犯之

以卒而不懼及置義而不遷請諡曰果

右驍衛大將軍致仕故王令莊諡議

伏以王令莊嘗事和門頗探戎畧久司羽衛之職晚分符竹之任始末不懈民庶興謠黃髮彌年優游卒歲稽其往行豈不謂之寬樂令終乎按諡法寬樂令終曰靖請諡曰靖

諫議張易諡議

張易抱耿介之性韞剛直之風宇量獨高識斷明擅詳狀其行昔歲國宗有北門之驚而王師不振大臣獻畫多所

異同易抗辭而前獨屈羣議寧難之畧潛合睿謀祇如面  
斥奸臣不畏強禦傾邪者見之而屏息黨錮者聞之而銷  
聲而又集諫議之書極匡救之理啟迪聖覽規贊大猷忠  
鯁之懷風節恒峻議名之狀一惠爲諡謹按諡法直道不  
撓曰正

右領軍衛將軍譚漢鐸諡議

伏以漢鐸以其少年鄉曲有譽頃遭世否蘊有成謀載執  
干戈散招逋叛保乂故土營衛屬城勲伐因彼有稱爵位  
爰茲而陟按諡法安民立政曰成漢鐸戍守之民競於亂



而故土不遷豈不謂安民立政乎請諡曰成謹議

諫議大夫江文蔚諡議

文蔚昔者持慮之日對仗彈事廷劾宰相剛直之性無所顧憚秉心一德中立不回按諡法一德不懈曰簡

太弟少傅李匡明諡議

伏以先王論德行以爲諡稽其往者慎終有稱旣啟殯而有期諒美名而可易太弟少傅李匡明襲爵承家匪躬立事爰自紫垣演誥潤色皇猷烏府提綱申明庶獄同安羣郡惠政以成林林之中清風久著而又攻碁善翰知音

聲執射而容體有儀飲酒而程度不惑學通周問尤多能  
矣謹按諡法博聞多能曰獻李匡明請諡曰獻

保義軍節度使鍾承勣諡議

伏以鍾承勣寇鄧名家褚賈洪族連戚里之貴開爵邑之  
封揚厯清途周旋峻秩再處方州之任尋統下瀨之師能  
保和柔奄至淪謝稽諸往行以議易名謹按諡法和柔居  
中曰懿謹議

司空嚴續諡議

據考功列到行狀云嗣承慶基有象賢之德中正不倚秉

心罔渝祇如再踐鈞樞而迎魯館富貴絕驕矜之色始終  
無險陂之心又以道著彌綸功扶翼戴荷先朝之顧命贊  
登極之法儀百度惟貞四方是則再稽前烈敢忘至公謹  
按諡法和柔居中曰懿

右千牛衛將軍王再興諡議

伏以再興經踐歲紀序爲將臣昔嘗總翊衛之權居右廣  
之職戎律旣秉謀誠豈無然而偃師中府謝病終老勲伐  
未著爵位虛崇命數彌加諡名宜賜竊尋其家狀頃自洛  
京仗義南渡擇主而事思慮不違按諡法通不爽願曰恩

謹議

右衛使司空李承祚諡議

伏以啟殯納柩日月有期諡行易名始終斯著具銜李承祚承家將種勲德有稱惇謹爲人忠勤立事洎司武侯夙夜警巡奸盜克殲市廛無撓考狀昭載名實有倫按諡法夙興警事曰敬李承祚請諡曰敬謹議

龍衛軍使司空劉崇禧諡議

夫名實有倫在乎素履考功無籍莫得而書今據故吏裴洪隱紀其行事有司質以爲諡惟崇禧一昨受推轂之命

師次淮陰終於王事服勤死衆總於弗忘是謂夙夜就事受命不遷曰敬劉崇禧請諡曰敬謹議

太尉王建諡議

故具銜王建卒尚書省考功錄到行狀其人頃因寇亂起青徐部入魏梁師乾寧中與其徒葛舟來侵壽壘無陣北爭奔涉溺者萬計建獨得數騎臨水勢蹙於是下馬地鬪劍戟相搏奮有餘勇人莫之勅俄而免胄請執獻命我師爰從委質亟立前勲擒李遇於宣城逐王茂章於淝水攻無錫走越寇建有功也出刺郡吏民無撓疆郵以寧偃師

多年懸車卒歲黃髮彌壽忠亮惟堅按諡法克敵勤民曰桓

左威衛大將軍瑯琊太尉侍中王府君墓誌銘并

序

公諱繼勲字紹元瑯琊臨沂人因家爲泉州晉江人也其先自秦漢至隋唐累世名德冠冕蟬聯不絕國史家牒莫不詳焉故所謂仁人之利本枝百世昭穆無窮若夫離翦佐時寧亂定功於前渾祥輔主濟民垂名於後歸刀示信誓水指期或開土肇基宏大功業近則我祖有之也別宗

因地始封閩王諱審知族人尊之是爲太祖四世之親因之追贈故桂州陽朔縣令贈司徒諱玉公之高祖也司空贈太師中書令諱恁曾祖也守泉州刺史贈侍中追諡武肅諱審邦皇父也福建管内三司發運副使檢校司徒贈太尉諱延禎皇考也崇國太夫人宋氏妣也公大昴炳靈祥麟叶趾弱齡襲爵寅亮秉躬我顯祖光宅閩區功格東表漢封三越奕世重熙修職貢方不替獻命中間赤符未集作帝自娛維彼哲人振振公族矧復閩隸殘孽乘釁肆兇公能刻日指期對天永誓果見克殲猾豎大刷恥讎再

造邦家疏爵崇命英蕩華路鸞鈴飛鑣加服九章踐登二  
事高陽舊里繁盛昔時行部晉安遺愛未泯保大四年諭  
順祐之理稽筮遷之徵寶融適變而動公臆斷有焉帝嘉  
其誠允答高秩拜侍中加特進賜推忠効節奉聖功臣食  
邑三千戶戴蟬珥貂入侍帝闈功冠羣后位隆鼎司五年  
領池都團練觀察處置等使守池州刺史秩滿考成績之  
狀居奏課之最再命陟庸不替厥位七年崇國太夫人薨  
聞至自傷行役版輿闕奉陟屺增望敬勞永思忽焉哀驚  
迨將絕息羸病扶杖允莫能興萬石君純行篤孝人皆儼



倫焉卒哭告祔金革從權起復視事共治七載宜民宜人  
無怨無惡惠政誕洽庶績咸熙朝拜左威衛大將軍屯守  
期門率厲士校玉顏鑒物溫言煦春遇士大夫有禮與小  
人有恩器度豁然貴而不佚兼以書善楷妙經詰墨迹餘  
暇手寫好學不倦爲善是稱招禮耆儒宏廣經義通方之  
訓隆諸子弟堂構斯盛由公負荷有此之賢如此之親嗚  
呼天不憖遺哲人其萎享年四十有五以保大十四年七  
月十二日薨於京師崇禮坊私第正寢皇上撫几增悼廢  
朝三日詔鴻臚護葬司儀禮賵賻加等啟殯右衛上將軍

諡曰敬禮也以其年八月二十五日葬江寧縣安德鄉安  
宜里往日卜窆於此鄉先夫人青陵原合祔禮也嗚呼祖  
庭撤奠遷柩屬紼素旒委以曳軫雲翼翼而蔽驂笳鼓悲  
鳴霜風慘冽世嗣號而踊絕虞歌挽以縈紆嗚呼既葬皇  
皇求而不見親賓拜以復土輿仗回而下岡微陽疎林歸  
軒空蓋公娶清河郡夫人崔氏舊朝相國允族孫女也秀  
發景胄訓承大家曹謝賢才維則是效裴王宗族作嬪可  
偕不幸先公而亡繼室滎陽郡夫人鄭氏往歲名推賢淑  
翼贊宮闈玉度有輝蘭儀誕茂作儷於王公從夫爵禮也

長男傳嗣池州中軍使顯居右職是司鼓鞞秉同律以聽  
軍聲陳旌旗以鞠師旅在昔宣任今爲具臣仁孝之行天  
誘其衷端已厲俗勤節苦學寡欲無玩瓌璋奇才或以德  
進而必待舉次男曰傳憲次男曰傳勗並冠而未仕就賢  
親師進德修業吾門以大其在茲乎有女二人長有適人  
爲婦之端次以少未笄旣喪父天殆無所怙箴管右佩婉  
惠其儀致雍昔與嚴助同鄉人見諸任在列仰覲亮迹合  
紀殊庸拂琬玉以增悲愧銘頌之陋畧辭曰

惟聞有雄冠彼百越皇皇我祖昭昭丕烈景胄流芳維公

則哲襲爵弱齡守命邦節伊昔故土猾豎肆逆放弑我君  
盜據我國世祚中零厥心否塞潛運神謀入翦凶慝泉山  
紆盤秀山高峙大荒東流禹迹攸紀帶海一隅膏壤千里  
疇昔賞功作牧於此崇徽九命踐登三事戴珥貂蟬帝闕  
入侍守郡池陽風化大治兩地甘棠猶詠蔽芾執親之喪  
杖寢在廬漢文權制墨綬外除權從金革起剖虎符期門  
總旅警衛宸居學業優備文武不墜分袂藏書永錫來嗣  
師禮耆儒論道說義階軒柱楹墨迹猶記偉哉君子威儀  
堂堂蟬冕照面玉顏生光聚蘭鬱茂高風隕霜緬邈不見

人懷永傷元堂一閉兮冥冥幽魂江邊古路兮原頭新墳  
青林松栢兮他年子孫碑存荒草兮傷嗟哲人

唐故金華大師正和先生劉君碑銘

并序

先生諱日新字繼平閩侯官人也顯考諱極本朝將作少  
監端州刺史妣穎川夫人陳氏先生初年誦詩讀書對客  
答義佩觴獨立岐嶷不羣七歲舉童子擢第釋褐授京兆  
府文學執簡對簿吏情若縈振衣彈冠真趣自逸在昔避  
狄出雒由道涉淮桑野掛書卻公府之辟浮提記柱史之  
文出仁義室廬棲神世表脫衣冠桎梏蠲累塵纓受師於

問政先生聶君卽天桂元同先生閩邱君門人也絕其私  
親道門如其宗祔焉先生稟太素五神之教內府孔明稽  
玉帛大厯之符前修可契器宇外朗襟靈內融雖因文爲  
世華許誰雕僞縱使迹在人事俗自喧浮爾乃釋滯昇虛  
句絕元而自牧澄源返照慙勿我生謂五味口爽撤按貶  
羞一簋歲暮終身晏如亦何必翦薤腸消嚙金尸腐者哉  
保大十一年夏仲月二十三日晨起命易衽席并几杖履  
遷於正寢凡附身者一一陳之然後秉盥洗漱理髮斷爪  
勝衣攝袂湛然肅容展繞露壇峻降延閣降屈屢拜如有

禱請卽日終於金陵紫極宮壽七十有六毀綴則屈身若  
恒淹襲而顏色不變巍然蟬蛻宛爾形畱皇上撫几移時  
增悼永傷乃命有司給喪事內臣護喪加禮也儲后親王  
欽順元祖敬接羽人恒於話言多所師仰中朝元輔舊齒  
名賢冲素見交軌跡相結天不憖遺人懷永傷空懷鶴弔  
之風莫問鳬飛之路門人捧持遺舄緬慕彼蒼臨谷難追  
飛筠已遠以其年六月十二日歸靈於方山隱晦解脫恍  
惚其中綿綿常存天地長永銘曰

微妙之教立道爲名精思間奧勤行軌程猶龍難狀扣寂

無聲夫子務進階漸而成愛尚文章襟抱質素滄混人事  
心節堅固五味口爽一簋歲暮食氣者神戶樞不蠹養志  
養神壽考惟寧明明理命寂寂潛齡元駕一解飛行不停  
誰期汗漫我出青冥金陵之鄉方山之陽葛仙澤藪寶華  
宮房解節何往歸形斯藏松喬鶴老萬古淒涼